



**TEKSTUALNI DIO
REGULACIONOG PLANA
„KVADRANT C - MRIJIN DVOR“
(Prijedlog)**

Nosilac pripreme Plana:
Gradonačelnik

Nosilac izrade Plana:
Zavod za planiranje razvoja
Kantona Sarajevo

Obrađivač:
Služba za urbano planiranje, investicije,
stambene i komunalne poslove





UVOD

Odluka o pristupanju izradi Regulacionog plana „Kvadrant C – Marijin Dvor“ (u daljnjem tekstu „Plan“) usvojena je na sjednici Gradskog vijeća Grada Sarajeva održanoj 24.02.2016. godine („Službene novine Kantona Sarajevo“, broj 11/16). U cilju izuzimanja zemljišta za izgradnju objekta Muzeja savremene umjetnosti Ars Aevi, usvojene su Izmjene i dopune Odluke o pristupanju izradi Plana („Službene novine Kantona Sarajevo“, broj 51/18 i 15/19).

Osnovni cilj izrade Plana je preispitivanje prostornih mogućnosti za distribuciju, organizaciju i izgradnju nove fizičke strukture, uz prethodnu analizu sagledavanja postojećeg građevinskog fonda, njegove namjene i funkcija u svrhu kvalitetnijeg urbanističkog rješenja na ovom lokalitetu. Prema prostornim mogućnostima u obuhvatu Plana, cilj je urbanističkim rješenjem stvoriti uslove za izgradnju Muzeja savremene umjetnosti Ars Aevi, novih poslovno-stambenih i poslovnih objekata, planiranje otvorenih javnih površina, zadržavanje vrijednih zelenih površina uz uvažavanje svih kategorija zelenila i kvalitetno saobraćajno rješenje.

U skladu sa Odlukom o pristupanju izradi Plana Zavod je pristupio izradi istog na ažurnim geodetskim podlogama u vektorskom obliku u razmjeri 1:1000 i u skladu sa Elaboratom o inženjersko - geološkim i mehaničkim karakteristikama tla urađenim od strane Zavoda geologiju Sarajevo iz 2002. godine.

1. GRANICE RAZMATRANJA I POVRŠINA

Područje koje je obuhvaćeno Planom ograničeno je:

- sa sjevera glavnom gradskom saobraćajnicom – Ulica Zmaja od Bosne,
- sa istoka trasom I transversale (granicom općina Centar i Novo Sarajevo),
- sa zapada trasom II transversale (Ulica Hamdije Čemerlića),
- sa juga Vilsonovim šetalištem i rijekom Miljackom

Površina obuhvata Plana iznosi $P=14,6$ ha.

2. ODNOS PREMA RAZVOJNOM PLANU PROSTORNOG UREĐENJA

Urbanističkim planom grada Sarajeva za urbano područje Sarajevo za period 1986.-2015. godine („Službene novine Kantona Sarajevo“, br. 5/99, 4/02 i 37/14), razmatrani lokalitet nalazi se u užem urbanom području Sarajeva prema nivou gradskih centara – Gradsko jezgro, a kao namjena površina utvrđena je zona pod nazivom: Poslovna zona „Novo Sarajevo“ (1.5.-15.). Opredjeljenja data u razvojnom planu prostornog uređenja se u potpunosti uvažavaju kroz izradu urbanističkog rješenja Plana kao potpuno otvorenog javnog kvadranta kome gravitiraju svi stanovnici grada i u kom je izvršena distribucija sadržaja po nivou centara - gradsko jezgro kao primarni centar kome gravitira cjelokupno stanovništvo grada i regije, a u nekim aspektima Bosna i Hercegovina kao država.



3. POSTOJEĆE STANJE (prirodni i stečeni uslovi)

Područje obuhvaćeno utvrđenim granicama Plana nalazi se u kontaktnoj zoni sa: RP „Kvadrant C1 – Marijin Dvor“, RP „Gradski centar – Marijin Dvor“ i RP „Centar – Novo Sarajevo“.

Na osnovu Elaborata o inženjersko - geološkim i mehaničkim karakteristikama tla, urađenim od strane Zavoda geologiju Sarajevo iz 2002. godine, date su karakteristike tla i preporuke za građenje u obuhvatu Plana.

Nagib terena je manji od 5%, što spada u optimalno povoljne terene za gradnju svih vrsta objekata različitih spratnosti i namjena.

Sa aspekta geološke građe, ovaj teren je izgrađen od aluvijalno-deluvijalnih sedimenata kvartarnog pokrivača u kojima su, neposredno ispod površine i humusnog pokrivača izdvojene tamnosmeđe organogene padinske ilovače sa drobinom koje leže preko crvenomrkih padinskih ilovača sa drobinom. Debljina ovih naslaga iznosi 1 - 3m. Ove naslage leže preko šljunaka čija debljina varira od 3 - 4m, odnosno koji se nalaze na dubinama od 3- 6,5 -7m ispod sadašnje površine tla ovog terena.

U šljuncima u središnjem dijelu terena utvrđeno je prisustvo sočiva nepravilnog oblika i različite debljine naslaga krečnjačke drobine pomiješane sa naslagama šljunka i pijeska. Debljina ovog sočiva se povećava posmatrajući od istoka ka zapadnom dijelu obuhvata. Inače, debljina ovog sočiva varira od 0,5 u istočnom, do 2,5m u zapadnom dijelu obuhvata.

Ispod šljunka su naslage geološkog supstrata predstavljene laporima gornjeg miocena koje leže na dubinama od 5,5 - 6m u istočnom, odnosno na dubinama od 6,0 - 7,0m u zapadnom dijelu obuhvata.

Kada su u pitanju hidrogeološke karakteristike ovog terena potrebno je istaći da su povoljne, ali uz napomenu da je u šljuncima utvrđena pojava zaglinjenosti i muljevitosti uz prisustvo podzemne vode na dubinama od 2 - 6 m ispod sadašnje površine tla.

Tlo je izgrađeno od humusa ispod koga leže naslage kvartarnog pokrivača predstavljene tamnosmeđim i crvenomrkim ilovačama sa drobinom, krečnjačkom drobinom i šljuncima. Sve ove naslage leže preko lapora koji čine geološki susprtat.

Ovo tlo je STABILNO i na njemu nisu uočene pojave nestabilnosti, odnosno klizanja i odroni tla. Također, nisu uočene pojave raskvašavanja tla.

Na osnovu seizmotektonske karte BiH, područje Sarajeva izdvojeno je pod 7° Merkalijeve skale (MSC). Ova vrijednost je računata za srednje uslove tla, što znači da bi trebalo obratiti pažnju na prirast seizmičkog intenziteta u lošim sredinama pa se dodaje +1° MCS.

4. ODNOS PREMA POSTOJEĆEM GRAĐEVINSKOM FONDU

Građevinski fond je utvrđen putem ankete provedene na terenu 2017. godine, čiji rezultati ukazuju da na razmatranom području egzistiraju 34 objekta: deset (10) stambenih, jedan (1) stambeno-poslovni (Importane centar), jedan objekat ambasade i 22 poslovna objekata različite namjene (MUP, Historijski muzej, srednje i visoko obrazovanje, banke i dr.).



Spratnost objekata kreće se od P do P+11. Kategorije i boniteti objekata su različiti i kreću se od prve (I) do šeste (VI) kategorije.

Planom se zadržava 12 poslovnih objekata ukupne tlocrtne površine 23.239 m² i ukupne bruto građevinske površine od 91.686 m² i sa cca 70 – 100 stanovnika u postojećim stambenim jedinicama.

Na grafičkom prilogu broj 6. - Odnos prema postojećem građevinskom fondu, označeni su objekti koji se ruše, a koji je sastavni dio Plana.

Za realizaciju novoplaniranih sadržaja potrebno je srušiti 22 objekta ukupne tlocrtne površine 10.431 m² i ukupne bruto građevinske površine 18.044 m².

Urbanističko - tehnički pokazatelji / postojeće stanje/:

• Ukupna površina obuhvata Plana	14,6 ha
• Tlocrtna površina objekata	33,670 m ²
• BGP-bruto građevinska površina	109,730 m ²
• Procent izgrađenosti (Pi)	23%
• Koeficijent izgrađenosti	0,7

5. KONCEPT PROSTORNE ORGANIZACIJE

Urbanističko rješenje Plana karakteriziraju tri osnovne prostorne i funkcionalne zone:

- zona sa već izgrađenim površinama i postojećim objektima - zauzima zapadni dio obuhvata uz Vilsonovo šetalište i glavnu gradsku saobraćajnicu na kojoj su locirani objekti visokog i srednjeg obrazovanja;
- zona rezidencijalnih objekata, poslovnih objekata i Historijskog muzeja – zauzima jugoistočni dio obuhvata (prostor uz Vilsonovo šetalište i trasu Prve transverzale);
- zona nove izgradnje – zauzima centralni dio obuhvata – prostor uz ulicu Zmaja od Bosne i Vilsonovo šetalište.

Unutar navedenih zona izdvajaju se pretežne namjene površina, a kako slijedi:

5.1 Namjena površina

Prostornom organizacijom planiranih objekata i distribucijom sadržaja koje su angažirane za izgradnju i korištenje, definisane su sljedeće namjene površina u obuhvatu ovog Plana:

1. zona obrazovanja (srednje i visoko) -----	34.515 m ²
2. poslovno-stambena zona -----	21.320 m ²
3. poslovna zona -----	8.115 m ²
4. zona kulture -----	12.640 m ²
5. zona – diplomatsko konzularna predstavništva -----	7.600 m ²
6. zona zelenila – aleja „Vilsonovo šetalište” -----	23.896 m ²
7. zona javnih površina i trga -----	14.646 m ²
8. zona saobraćajnih površina (kolsko pješački prilazi, površine za primarni saobraćaj i saobraćaj u mirovanju) -----	23.268 m ²



5.2. Razmještaj fizičkih struktura

Urbanističko rješenje u obuhvatu Plana rezultiralo je opredjeljenjima iz planova višeg reda, u prvom redu Urbanističkog plana grada Sarajeva za period 1986. – 2015. godine, koji su uticali na urbanistički koncept potpuno otvorenog javnog kvadranta kome gravitiraju svi stanovnici grada i u kom je izvršena distribucija sadržaja po nivou centara - gradsko jezgro kao primarni centar kome gravitira cjelokupno stanovništvo grada i regije, a u nekim aspektima Bosna i Hercegovina kao država.

Ovim Planom obezbjeđuju se uslovi za transformaciju područja u cilju bolje funkcionalnosti i organiziranosti, povećane atraktivnosti i racionalnijeg korištenja građevinskog zemljišta na način da nova izgradnja poslovnih, poslovno stambenih objekata sa sadržajima društvene infrastrukture, objekta Muzeja savremene umjetnosti Ars Aevi, rekonstruiranje i poboljšanje saobraćajnica kako pješačkih tako i kolskih u okviru područja planiranja, a koje će korespondirati sa kontaktnim zonama van obuhvata Plana i biti u skladu sa osnovnim kriterijima organizacije i funkcioniranja sistema gradskih centara, unutar kojih je otvoreni kvadrant kojem imaju pristup svi građani. Urbanistička kompozicija je tako koncipirana da može obezbijediti sklad između novih i zatečenih postojećih arhitektonskih masa, posebno stavljajući akcent na kompoziciju ukupne ulične fasade prema ulici Zmaja od Bosne i Vilsonovom šetalištu. U materijalizaciji svih objekata potrebno je koristiti tehnološki napredne i energetske učinkovite materijale.

U cilju unapređenja mikroklimatskih uslova i umanjenja utjecaja dominantnih pravaca strujanja zraka, kod objekata visine preko 21 m preporučuje se da oblikovanje fasada, posebno onih izloženih direktnom djelovanju vjetra primarnih vjetrokoridora iz pravca istoka, vrši kroz blago zakrivljene, razučene ili arhitektonski artikulirane forme, te da se u okviru arhitektonskog rješenja, gdje je to izvodljivo, planira integracija horizontalnog i vertikalnog zelenila kao sastavnog dijela objekta, na način koji doprinosi poboljšanju kvaliteta zraka, ublažavanju efekta urbanog toplotnog otoka i unapređenju ukupne mikroklimе, bez utjecaja na utvrđene urbanističko-tehničke parametre.

Izgradnja novih fizičkih struktura planirana je na katastarskim i vlasničkim parcelama, što omogućava lakšu realizaciju planirane gradnje. U obuhvatu Plana planirano je sedam /7/ novih građevinskih parcela unutar kojih je moguća izgradnja objekata sa decidno definiranim namjenama objekata, maksimalnim građevinskim linijama objekata, građevinskim linijama podzemnih etaža/garaža/, maksimalnim visinama objekata, spratnostima svih planiranih objekata i maksimalnim koeficijentima i procentima izgrađenosti građevinskih parcela. Unutar utvrđenih građevinskih linija omogućava se fleksibilnost arhitektonske forme i oblika objekata na drugačiji način, uz poštovanje utvrđenih urbanističko-tehničkih parametara uključujući bruto građevinske površine i visine objekata. Fleksibilnost forme i oblika ne može mijenjati utvrđene parametre.

Najveći dio novoplanirane gradnje predstavljaju poslovno-stambeni objekti, objekt Muzeja savremene umjetnosti, poslovni objekti i rezidencijalni objekt. Vertikalni i horizontalni gabariti objekata su u direktnoj vezi sa raspoloživim veličinama parcela i međusobnim odnosom objekata koji moraju zadovoljiti minimum distanci zbog osunčanja i vizura. Propisanim urbanističko-tehničkim uslovima za planiranu



gradnju vodilo se računa o ograničenjima u prostoru kao što su veličina građevinske parcele, distanca od susjednih objekata, distanca od repera u prostoru, kao što je objekt Prirodno-matematičkog fakulteta (djelo arhitekta Juraja Neidhardta), insolacija objekata, odnos prema rijeci i Vilsonovom šetalištu kao pješačkoj zoni grada.

Prizemlja, kao i više etaže svih novoplaniranih objekata, u ovisnosti od funkcije objekta, mogu imati sadržaje kao što su trgovina, servisne usluge, ugostiteljstvo i administracija, kao i određene kapacitete za sadržaje društvene infrastrukture.

U okviru definiranih zona, odnosno namjena površina, izvršena je distribucija planirane izgradnje objekata na sedam građevinskih parcela i to na sljedeći način:

- Građevinska parcela br. 1

Poslovno-stambeni objekti prema ulici Zmaja od Bosne, maksimalne spratnosti od P+4 - P+11, planirani su na način da svojim gabaritima formiraju trg prema ulici Zmaja od Bosne kao nastavak trga formiranog ispred Importane centra. Građevinska linija horizontalnih gabarita objekata čini povučenu uličnu fasadu prateći građevinsku liniju postojećeg objekta Importane centra. Objekti su planirani na vlasničkoj parceli u sklopu koje je i planirana javna površina koja se koristi kao trg. Ukoliko se ukaže potreba za većim brojem parking mjesta objekti mogu imati više podzemnih etaža u kojima mogu biti poslovni i komercijalni sadržaji, ali i podzemne etaže garaže koje moraju zadovoljiti potrebe saobraćaja u mirovanju. U ovisnosti od namjene pojedinih dijelova objekata kao i prilagodbe spratnih visina prema namjeni prostora i funkciji objekta, može doći do odstupanja predloženih spratnosti, ali maksimalna visina najviših dijelova objekata ne može biti veća od 50m od nivelacione kote prizemlja. Bruto građevinska površina, bilo da se radi o poslovnim, komercijalnim ili stambenim namjenama, mora zadovoljiti broj parking mjesta prema ovim Planom utvrđenim parametrima za saobraćaj u mirovanju.

Objekti su planirani kao poslovno-stambeni sa 80% poslovnog i komercijalnog sadržaja i 20% stambenog prostora, uz uslov da stambeni prostori budu orijentirani na južnu stranu.

Objekti su slobodnostojeći i mogu biti povezani toplom vezom kroz drugu (2), treću (3) i četvrtu (4) etažu. Maksimalne dimenzije pasaža – tople veze, od kote partera (prizemlja) do drugog sprata iznosi 14.0m x 25.0m, a dimenzije tople veze od 2 (drugog) do 4 (četvrtog) sprata iznose 16.0m x 25.0m,

Urbanističko-tehnički parametri za građevinsku parcelu br.1:

- Površina parcele	15,703m ²
- Tlocrtna površina	5,900m ²
- BGP	56,600m ²
- Procent izgrađenosti	39%
- Ki.....	3,7
- BGP – stambenog prostora	11,100m ² (112 stambenih jedinica)
- BGP – poslovnog sadržaja	45,500m ²



- Građevinska parcela br. 2

Planirana je II faza izgradnje poslovno-stambenog objekta Importane centra maksimalne spratnosti od P+5 - P+11. Horizontalni gabariti II faze objekta formiraju povučenu uličnu fasadu prateći građevinsku liniju postojećeg objekta. Objekt je planiran na vlasničkoj parceli, sa tri ili više podzemnih etaža u kojima mogu biti poslovni i komercijalni sadržaji, ali i podzemne etaže garaže koje moraju zadovoljiti potrebe saobraćaja u mirovanju. U ovisnosti od namjene pojedinih dijelova objekta, kao i prilagodbe spratnih visina prema namjeni prostora i funkciji objekta, može doći do odstupanja predloženih spratnosti, ali maksimalna visina najviših dijelova objekta ne može biti veća od 50m od nivelacione kote prizemlja.

Objekt je planiran kao poslovno-stambeni sa 80% poslovnog i komercijalnog sadržaja i 20% stambenog prostora, uz uslov da stambeni prostori budu orijentirani na južnu stranu.

Urbanističko - tehnički parametri za građevinsku parcelu br. 2:

- Površina parcele	2,175m ²
- Tlocrtna površina	1,180m ²
- BGP	11,520m ²
- Procent izgrađenosti	54,25%
- Ki.....	5,3
- BGP – stambenog prostora	2,304m ² (25 stambenih jedinica)
- BGP- poslovnog sadržaja	9,216m ²

- Građevinska parcela br. 3

Objekt na građevinskoj parceli broj 3. planiran je u svojim postojećim horizontalnim gabaritima sa mogućnošću povećanja vertikalnih gabarita. Objekt se može rekonstruirati ili izgraditi novi kao zamjena građevinskog fonda. Bez obzira o kojoj se vrsti intervencije radi, Planom utvrđeni urbanističko tehnički parametri i maksimalna spratnost objekta moraju biti ispoštovani. Objekt je maksimalne spratnost P+2 do P+4, a maksimalna visina objekta prema ulici Vilsonovo šetalište iznosi 21m. U ovisnosti od namjene pojedinih dijelova objekta, kao i prilagodbe spratnih visina prema namjeni prostora u objekta, može doći do odstupanja predloženih spratnosti, ali maksimalna visina najviših dijelova objekta ne može biti veća od 21m. Bruto građevinske površine poslovne, komercijalne ili stambene namjene moraju u odnosu na površine istih zadovoljiti broj parking mjesta prema Planom utvrđenim parametrima za saobraćaj u mirovanju. Objekt je planiran kao poslovno-stambeni sa 80% poslovnog i komercijalnog sadržaja i 20% bruto građevinske površine za stambeni prostor, uz uslov da stambeni prostori budu orijentirani na južnu stranu.

Urbanističko - tehnički parametri za građevinsku parcelu br. 3:

- Površina parcele	2,280m ²
- Tlocrtna površina	2,080m ²
- BGP	8,400m ²
- Procent izgrađenosti	91 %
- Ki.....	3,7
- BGP – stambenog prostora	1,660m ² (16 stambenih jedinica)



- BGP – poslovnog sadržaja 6,820m²

- Građevinska parcela br. 4

Diplomatsko konzularno predstavništvo spratnosti P+2 sa maksimalnom visinom objekta od 21m, odnosno visina najviših dijelova objekta ne može biti veća od 21m.

Urbanističko - tehnički parametri za građevinsku parcelu br. 4:

- Površina parcele	5,100m ²
- Tlocrtna površina	2,160m ²
- BGP	6,475m ²
- Procent izgrađenosti	42,4%
- Ki	1,27

- Građevinska parcela br. 5

Muzej moderne savremene umjetnosti Ars Aevi, spratnosti od P+SP+1. Muzej je projektirao talijanski arhitekta Renzo Piano. Cilj projekta Ars Aevi je formiranje Internacionalnog multikulturalnog centra i Muzeja savremene umjetnosti u Sarajevu. Objekti budućeg arhitektonskog kompleksa Arsa Aevi bit će disperzno locirani, a realizacija projekta je otpočela izgradnjom pješačkog mosta koji spaja lijevu i desnu obalu Miljacke. Objekat je izuzet iz režima zabrane građenja („Službene novine Kantona Sarajevo”, broj 51/18 i 15/19) radi ubrzanja procedure dobivanja potrebnih saglasnosti i njegove realizacije. Odobrenje za građenje izdato je 2024. godine.

Urbanističko-tehnički parametri za građevinsku parcelu br. 5:

- Površina parcele	7,350m ²
- Tlocrtna površina	2,996m ²
- BGP	6,250m ²
- Procent izgrađenosti	40%
- Ki	0,85

- Građevinska parcela br. 6

Objekt na građevinskoj parceli broj 6. planiran je kao poslovni objekt u svojim postojećim horizontalnim gabaritima sa mogućnošću povećanja vertikalnih gabarita. Objekt se može rekonstruirati ili se može izvršiti zamjena građevinskog fonda. Bez obzira o kojoj se vrsti intervencije na objektu radi, Planom utvrđeni urbanističko tehnički parametri i maksimalna spratnost objekta moraju biti ispoštovani. Objekt je maksimalne spratnosti P+2-P+4, a maksimalna visina objekta prema ulici Vilsonovo šetalište iznosi 21m. U ovisnosti od namjene pojedinih dijelova objekta, kao i prilagodbe spratnih visina prema namjeni prostora u objektu, može doći do odstupanja predloženih spratnosti, ali maksimalna visina najviših dijelova objekta ne može biti veća od 21m.

Urbanističko - tehnički parametri za građevinsku parcelu br. 6:

- Površina parcele	1,518m ²
- Tlocrtna površina	1,418m ²
- BGP	5,600m ²



- Procent izgrađenosti 93,5%
- Ki..... 3,7

- Građevinska parcela br. 7

Na građevinskoj parceli planirana je dogradnja postojećeg objekta Mašinskog fakulteta, spratnosti SP+2.

Urbanističko-tehnički parametri za građevinsku parcelu br. 7:

- Površina parcele 515m²
- Tlocrtna površina 515m²
- BGP 1,900m²
- Procent izgrađenosti 100%
- Ki..... 3,7

Urbanističko - tehnički parametri za sedam planiranih građevinskih parcela:

Urbanističko-tehnički parametri za svih sedam građevinskih parcela za izgradnju objekata utvrđeni su i prikazani na grafičkom prilogu broj 7. „Razmještaj, namjena i spratnost objekata” M 1:1000, utvrđeni i prikazani kroz tekstualno obrazloženje Plana i Odluku o provođenju Plana.

Sve planirane podzemne etaže poslovnih i komercijalnih sadržaja, kao i podzemne etaže garaža, mogu se međusobno povezivati na svim ili pojedinim nivoima planiranih objekata, kao i sa podzemnim etažama novoizgrađenih ili postojećih objekata na susjednim građevinskim parcelama, uz uslov međusobnog dogovora i usaglašavanja vlasnika, odnosno posjednika parcela i ispunjenja tehničkih uslova postojećih i planiranih infrastrukturnih sistema.

Ukoliko se prilikom izgradnje podzemnih etaža u zoni iskopa nalaze komunalni infrastrukturni sistemi (kanalizacione i vodovodne cijevi, gasne instalacije i dr.), investitor je dužan obezbijediti njihovu zaštitu. Sve mjere zaštite moraju biti projektirane i izvedene u skladu sa važećim tehničkim propisima, uslovima i saglasnostima nadležnih komunalnih institucija.

Na građevinskoj parceli broj 1. planirane su dvije samostalne podzemne garaže, utvrđene ovim Planom kao građevinska linija podzemnih etaža ispod novoplaniranog poslovno-stambenog objekta i građevinska linija podzemnih etaža ispod površine trga. Dvije cjeline se mogu povezati kao jedinstvena garaža uz uslov da se kroz izradu idejnih i glavnih projekata i mogućih tehničkih rješenja za povezivanje podzemnih etaža dobiju sve potrebne saglasnosti nadležnih institucija.

Ulazno - izlazne rampe za planirane objekte na građevinskim parcelama broj 1. i 3. moraju biti realizirane unutar utvrđenih regulacionih linija građevinskih parcela i preko uređenih kolsko-pješačkih površina koje su utvrđene u grafičkim prilogima Plana – faza urbanizam (grafički prilog br. 7 „Razmještaj, namjena i spratnost objekata” i prema grafičkom prilogu broj 2. iz Elaborata Idejno rješenje saobraćaja.

Planirana saobraćajnica unutar obuhvata Plana, neovisno o vlasničkim i posjedovnim odnosima, definira se kao javna saobraćajna površina namijenjena snabdijevanju i osiguranju pristupa svim postojećim i planiranim objektima. Podzemne etaže ukoliko se realiziraju ispod trase saobraćajnice, a koje funkcionalno služe kao garažni



kapaciteti ili komercijalni prostori, ne mijenjaju status predmetne površine kao javne saobraćajnice. U skladu s tim, predmetna površina se Planom tretira i koristi kao javna površina, što se na jednak način primjenjuje i na korištenje planiranog trga.

Ulica Vilsonovo šetalište, uz rijeku Miljacku, planirana je isključivo za pješački i biciklistički saobraćaj, što omogućava longitudinalni pravac rekreacije i pristup velikom broju korisnika. Korištenje i koncept prostornog uređenja za ulicu Vilsonovo šetalište utvrđeno je Elaboratom „Uređenje i mogućnost korištenja ulice Vilsonovo šetalište” („Službene novine Kantona Sarajevo”, broj 29/14).

Iz smjera ulice Zmaja od Bosne sa sjeverne strane obuhvata (između planiranih poslovno-stambenih objekata) planiran je pješački prodor ka Vilsonovom šetalištu i novom planiranom pješačko-biciklističkom mostu na rijeci Miljacki na južnoj strani obuhvata.

Površine utvrđene kao slobodne i zelene površine ne mogu se koristiti za druge namjene. Izgradnja i uređenje zelenih površina vrši se u skladu sa prethodno pribavljenom (odgovarajućom) dokumentacijom urađenom na osnovu Idejnog rješenja hortikulture, koja je sastavni dio Plana.

Saobraćaj i saobraćaj u mirovanju

Saobraćajno rješenje za predmetni prostorni obuhvat rezultiralo je opredjeljenjima iz planova višeg reda, u prvom redu Urbanističkog plana grada Sarajeva za period 1986 – 2015, koji su uticali na urbanistički koncept potpuno otvorenog javnog kvadranta kom gravitiraju svi stanovnici grada i u kom je izvršena distribucija sadržaja po nivou centara - gradsko jezgro kao primarni centar kome gravitira cjelokupno stanovništvo grada, regije, a u nekim aspektima Bosna i Hercegovina kao država, preuzetim obavezama i Elaboratom i članom 7. Odluke o provođenju elaborata „Uređenje i mogućnosti korištenja ulice Vilsonovo šetalište” („Službene novine Kantona Sarajevo”, broj 29/14).

Saobraćajni pristup za predmetno područje planiran je sa glavne gradske saobraćajnice, odnosno iz ulice Zmaja od Bosne na sljedeći način:

- postojeći ulaz kod Prirodno-matematičkog fakulteta se zatvara, a isti se, uz dodavanje isključne saobraćajne trake, pomjera za 80m u pravcu vožnje smjer Ilidža – Skenderija. Na ovoj lokaciji planira se nova saobraćajnica koja predstavlja ulaz u obuhvat.
Postojeća saobraćajnica, koja se zatvara, u jednom dijelu se prenamjenjuje u parking za potrebe Prirodno-matematičkog i Mašinskog fakulteta, a u preostalom dijelu kao zelena površina;
- izljevna traka i desni priključak kod postojeće zgrade MUP-a i
- izljevna traka i desni priključak za Importane centar.

U centralnom dijelu obuhvata planirana je javna saobraćajnica koja omogućava pristup postojećim i novoplaniranim objektima: Prirodno-matematičkom fakultetu, Muzeju savremene umjetnosti Ars Aevi, planiranom poslovno-stambenom objektu, planiranoj dogradnji Mašinskog fakulteta, objektu Šuma projekta, objektu uz ulicu Vilsonovo šetalište (Face tv) i svim već realiziranim objektima u obuhvatu Plana.



Na ovaj način omogućava se pristup svim objektima obzirom da realizacijom I (prve) transversale i realizacijom ulice Vilsonovo šetalište kao pješačko-biciklističke zone neće biti moguće pristupiti sa te saobraćajnice postojećim i planiranim objektima. Predložena mreža saobraćajnica unutar obuhvata, nakon njene realizacije, omogućava uspostavu posebnih režima odvijanja saobraćaja, a koji će biti prilagođeni potrebama svih vlasnika i korisnika ovog prostora.

6. ZELENILO

Izgradnja zelenih i otvorenih javnih površina planirana je u skladu sa osnovnim funkcijama zadovoljenja svakodnevnih potreba gravitirajućeg stanovništva sa pažljivo odabranim biološkim komponentama, a posebno sadnjom stablašica.

Navedene karakteristike lokaliteta, kao i karakter pretežne namjene, zahtijevaju da zelene površine zastupljenošću i prostornom distribucijom doprinesu ostvarenju zaštitno - estetskih i oblikovno-pejsažnih efekata. U tom cilju planirane su zelene površine, odnosno sadnja novih bioloških komponenti uz novoplanirane sadržaje, posebno stablašica, a u istu svrhu neophodno je sačuvati postojeće vrijedne zelene površine oko objekata obrazovanja i kulture i postojeće linijske sisteme formirane uz južnu i sjevernu granicu obuhvata Plana.

Ulica Vilsonovo šetalište predstavlja jedan od najvrjednijih drvoreda u Sarajevu. Ubrzani razvoj grada, izgradnja infrastrukture i intenziviranje saobraćaja uticalo je na zdravstveno stanje i ovog dragocjenog fragmenta gradskog zelenila, te je s tog aspekta neophodna kontinuirana zaštita. Iz Elaborata „Uređenje i mogućnosti korištenja ulice Vilsonovo šetalište“ preuzeta su sva planska opredjeljenja.

7. URBANISTIČKO - TEHNIČKI POKAZATELJI

Urbanističkim rješenjem unutar prostornog obuhvata Plana utvrđeni su sljedeći urbanističko - tehnički parametri:

- ukupna površina obuhvata 14.6 ha - 146.000m²
- broj stanovnika 550 - 750
- gustoća naseljenosti 37st/ha - 55st/ha

- ukupna tlocrtna površina objekata koji se zadržavaju 23.239 m²
- ukupna tlocrtna površina planiranih objekata 16.249 m²

ukupna tlocrtna površina objekata 39.488 m²

- ukupna BGP objekata koji se zadržavaju 91.686m²
- ukupna BGP planiranih objekata 95.410m²

ukupna BGP objekata 187.096m²

- procent izgrađenosti prostornog obuhvata (Pi) 27,05%
- koeficijent izgrađenosti prostornog obuhvata (Ki) 1,28